

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. कल 7में गेड़ दे मतदान दे कन्नै गै लोकसभा चुनाएं दी मतदान दी प्रक्रिया सम्पन्न। वोटें दी गिनतरी मंगलवार 4 जून गी करोआई जाग।
2. मते सारे एस्जिट पोल इशारा देआ करदे न जे बीजेपी दी नुमायंदगी आला राष्ट्री लोकतांत्रिक गठबंधन एनडीए सत्ता बरकरार रखने लेई तैआर।
3. श्री अमरनाथ जी दी सलाना यात्रा लेई केन्द्री थेआरबंद बलें दियां तकरीबन 450–500 बाद्धु कंपनियां तैनात कीतियां जांगन। प्रशासन इस ब'रे बड़ी बद्धु गिनतरी च शिव भक्ते दे यात्रा पर औने दी मेद।
4. डीजीपी आर.आर.स्वैन होरें आखेअ। ऐ जे जम्मू कश्मीर च मकामी आतंकिएं दी गिनतरी घटियै 20–22 रेई गेई ऐ, उआं विदेशी आतंकिएं दी चुनौती बरकरार।

<><><><><><>

Lok Sabhha Counting

लोकसभा चुनां, आंध्रप्रदेश ते ओडिशा दे विधानसभा चुनाएं दे कन्नो कन्नी विधानसभा दे उपचुनां लेई वोटें दी गिनतरी 4 जून गी बडलै 8 बजे थमां शुरू होग। मुख् चुनां आयुक्त राजीव कुमार होरें चुनां आयुक्त ज्ञानेश कुमार ते डॉ. सुखबीर सिंह संघु होरें मतगणना तैआरिएं दी समीक्षा कीती। आयोग मूजब मतगणना दे रूझान ते नतीजे निर्वाचन आयोग दी वैबसाईट Results.eci.gov.in ते वोटर हैल्पलाइन ऐप परन उपलब्ध होंगन। वोटर हैल्पलाइन ऐप गी गूगल प्ले स्टोर जांफही ऐपल प्ले स्टोर थमां डाउनलोड कीता जाई सकदा ऐ। तोआंई जम्मू कश्मीर च वोटें दी गिनतरी दिएं तैआरिएं गी मुक्दा रूप देई दित्ता गेआ ऐ। मतगणना दी प्रक्रिया 4 जून गी बडलै 8 बजे थमां सरबंधत संसदीय क्षेत्रें च शुरू होग। अधिकारिएं मूजब जम्मू संसदीय सीट ते उधमपुर–कठुआ दे कामयाब ट्रायल होई चुके दे न। श्रीनगर संसदीय क्षेत्र लेई एह ट्रायल शोरे कश्मीर अंतर्राष्ट्री कन्वैशन केन्द्र च लग्गा। बारामुला सीट लेई मतगणना डिग्री कालेज बारामुला च होग। अनंताग–राजौरी सीट लेई वोटें दी गिनतरी डिग्री कालेज अनंतनाग च कराई जाग। जम्मू च मतगणना एम.ए. एम कालेज जम्मू ते पालीटैकनिक विक्रम चौक च ते कठुआ च वोटें दी गिनतरी जीडीसी कठुआ च करोआई

जाग। कुल रलाइयै 2200 कर्मचारिएं गी मतगणना लेई सिखलाई दित्ती गेई ऐ, जिंदे चा 1300 गी मतगणना आले दिन ड्यूटी ताई ते बाकिएं गी तैआर रौहने लेई आखे गेदा ऐ।

<><><><><><>

7th Phase

लोकसभा चुनाएं दे 7में ते खीरी गेड़ च कल 62.36 प्रतिशत मतदान दर्ज कीता गेआ। इस गेड़ च 7 राज्यें ते इक केन्द्र शासत प्रदेश दिएं 57 संसदीय सीटें लेई वोट पाए गे हे। इंदे च उत्तर प्रदेश ते पंजाब दियां 13-13 सीटां, पच्छिम बंगाल दियां 9, बिहार दियां 8, ओडिशा दियां 6, हिमाचल प्रदेश दियां 4, झारखंड दियां 3 ते चंडीगड़ दी इक सीट शामिल ऐ। चुनां आयोग नै इक ब्यौन च आखेआ ऐ जे समूलचे देसै च सब्बै गेड़ें दरान मतदान अमन, रमानदारी ते सुचारू ढंगै कन्नै मुकम्मल होए।

<><><><><><>

LG-Vote

जम्मू कश्मीर दे उपराज्यपाल मनोज सिन्हा होरें कल लोकसभा चुनाएं दे 7में ते खीरले गेड़ तैहत उत्तर प्रदेश दे गाजीपुर च वोट पाने दे अपने अधिकार दा इस्तेमाल कीता। सिन्हा होर 2014 आले लोकसभा चुनां च गाजीपुर सीट थमां चुनां च गाजीपुर सीट थमां बीजेपी दे सांसद चुने गे हे। अपनी इक सोशल मीडिया पोस्ट च उपराज्यपाल होरें दस्सेआ जे उनें बल्लिया संसदीय सीट हेठ पौंदे मोहम्मदाबाद असैंबली हल्के दे ग्रां मोहनपुर च अपना वोट पाया। वोट पाने दे बाद उनें सब्बनें लोकें गी मतदान लेई प्रेरत करदे होई अपने इस लोकतांत्रिक अधिकार दा पक्क इस्तेमाल करने दी अपील बी कीती ही।

<><><><><><>

LS- Exit Poll

4 जून गी लोकसभा चुनाएं दी मतगणना शा पैहले निजी टीवी चैनलें ते होर दुइएं अजेसिएं चुनां परैत दे सर्वे दे नतीजे जारी कीते न। इंदे चा मते सारे च आक्खे गेदा ऐ जे भारतीय जनता पार्टी दी नुमायंदगी आला एनडीए लोकसभा चुनां च बहुमत हासल करियै सत्ता च वापसी करोग। इनें नतीजे थमां इशारा थहोंदा ऐ जे 543 मिंबरें आली लोकसभा च एनडीए गी दो तिहाई बहुमत थहोई सकदा ऐ। लोकसभा च सामान्य बहुमत लेई 272 सीटें दी लोड़ हुंदी ऐ। चुनां माहिरें नरेन्द्र मोदी दी नुमायंदगी आली एनडीए सरकार दे 350 शा बद्ध सीटां मिलने दा अंदाजा लाया ऐ। विपक्षी इंडी गठबंधन गी लोकसभा च 125 शा 150 सीटां थहोई सकदियां न। लोकसभा चुनाएं च बीजेपी दी नुमायंदगी आले एनडीए दा सिद्धा मकाबला कांग्रेस दे नेतृत्व आले इंडी

गठबंधन कन्नै हा। सत्तारूढ़ बीजेपी गी प्रधानमंत्री नरेन्द्र मोदी हुंदी नुमायंदगी लगातार त्री बारी सत्ता च परतोने दा भरोसा ऐ।

<><><><><><>

Exit Poll-J&K

लोकसभा चुनां 2024 दे कल खीरले गेड़ दे मतदान दे बाद जारी कीते गेदे एग्जिट पोलें दे मताबक जम्मू कश्मीर च नैशनल कांफ्रेंस गी 3 ते बीजेपी गी 2 सीटां हासल होने दी मेद दस्सी जा'रदी ऐ। ज्हादातर एग्जिट पोलें नै श्रीनगर, बारामुला ते अनंतनाग-राजौरी त्रऊं सीटां नैशनल कांफ्रेंस दी झोली जाने दा अंदाजा लाया ऐ जिसलै जे जम्मू-रियासी ते कठुआ-उधमपुर एह दवै सीटां बीजेपी गी थ्होई सकदियां न। एग्जिट पोलें मूजब बीजेपी दे मजूदा सांसद जुगल किशोर शर्मा कांग्रेस दे रमण भल्ला होरें गी हराई सकदे न जिसलै जे प्रधानमंत्री हुंदे दफ्तरै च राज्यमंत्री डॉ. जितेन्द्र सिंह हुंदे कांग्रेस दे चौधरी लाल सिंह हुंदे कोला जित्ती सकने दी मेद जताई गई ऐ।

<><><><><><>

Search

किश संदिग्ध नकलो हरकत बारे जानकारी थ्होने दे बाद सुरक्षा बलें जम्मू प्रांते दे सांबा ते पुंछ जिले च व्यापक तुपाई अभियान शुरू कीते दे न। सांबा जिले दे परमंडल इलाके च दऊं संदिग्ध लोकें दे दिक्खे जाने दी सूह थ्होने दे बाद पुलसे उत्थें तुपाई आली कारवाई शुरू कीती ते आले-दुआले दे जंगली इलाकें गी खरी चाल्ली खंगालेआ ते ताजा जानकारी थ्होने तगर कोई संदिग्ध नेई दिक्खेआ गेआ। तोआई पुंछ जिले च बी सुरक्षा बलें ते विशेष कारवाई बल एसओजी नै सांझे तौरा पर बफलिआज दे मड़ा जंगली इलाकें च इक तुपाई अभियान चलाए दा ऐ। एह कारवाई अतरू शुक्रवारें "डेरा की गली" इलाके संदिग्ध आतंकवादिएं दी मजूदगी बारे सूह थ्होने पर शुरू कीती गई ही। जिंदे बारे मन्नेआ जा'रदा ऐ जे एह घने जंगली इलाके च छप्पे दे होइ सकदे न। इलाके च किश चिर पैहले आतंकी टाकरें दे बाद सुरक्षा बघाई दित्ती गेदी ऐ। 4 जून गी वोटें दी गिनतरी होने आली ऐ ते इस प्रक्रिया च खलल पाने दी कोई कोश्ट ना कीती जा, एहदे करी राजौरी, पुंछ ते सांबा जिलें च सुरक्षा जबरदस्त होर निगगर करी दित्ते गेदे न।

<><><><><><>

Amarnath

52 दिनें तोड़ी चलने आली इस ब'रे दी श्री अमरनाथ जी दी यात्रा जेहड़ी 29 जून गी शुरू होइयै 19 अगस्त तोड़ी जारी रौहग, दी सुरक्षा लेई केन्द्री थेआरबंद बलें दियां कोई 4-5 सौ बाद्ध कंपनियां तैनात कीतियां

जा'रदियां न। यात्रा रस्मी तौरा पर 29 जून गी यात्रा दे दौनें बालटाल ते नुनवन आले रस्तेयां शुरू होग पर जम्मू थमां पैहला जत्थ एहदे इक रोज पैहले 28 जून गी भगवती नगर आधार शिविर थमां रवाना होग। प्रशासन दा आखना ऐ जे ऐकती यात्रा च भारी रश होने दी मेद कीती जा'रदी ऐ।

<><><><><><>

DGP Security

पुलस महानिदेशक आर.आर.स्वैन होरें कल आखेआ ऐ जे जम्मू कश्मीर च आतंकवाद दा ध्यान एल्लै मकामी आतंकवादिऐं कोला हटियै बाहरले आतंकवादिऐं पर केन्द्रत होइ गेदा ऐ ते लोक आतंकवादिऐं दी गिनतरी हुन बड़ी गै घट्ट रेही गेदी ऐ। उनें आखेआ जे इसलै मुख् चुनौती विदेशी आतंकवादी न, जिंदे अंदर कट्टरवाद ते भारत खलाफ दा जैहर भरियै इक बक्खी भेजेआ जा'रदा ऐ। कल मीरा साहब जम्मू च इक कार्यक्रम दे बाहरे पत्रकारें कन्नै गल्लबात करदे होई उनें आखेआ कोइ 4-5 ब'रें पैहले लोकल आतंकवादिऐं दी गिनतरी 150-200 तगर होंदी ही जेहड़ी ऐल्लै मसां खिच्चियै कोई 21-22 दे कोलकाल रेही गेदी ऐ।

<><><><><><>

Div.Com-Jashn-E-Hunar

जम्मू दे डिवीजनल कमीशनर रमेश कुमार होरें कल जम्मू हॉट च जश्न-ए-हुनर सिरलेख पर इक म्हीने तगर चलने आली प्रदर्शनी ते बिक्री कार्यक्रम दा उदघाटन कीता। प्रदर्शनी च हत्थखड्डी ते दस्तकारी चीजें-बस्ते सनें बड़ा मता होर दुआ मकामी साजो समेयान गी उत्थें रखे गेदा ऐ। आकाशवाणी दे जम्मू संवाददाता नै दस्सेआ जे प्रदर्शनी दा मकसद मकामी बपारिएं महिला उद्यमिएं, कारीगिरें, शिल्पकारें ते होर दुइयां सेवा देने आलें गी अपने उत्पादें गी दस्सने, प्रचार करने ते बेचने लेई उनेंगी मंच प्रदान करना ऐ। प्रदर्शनी च 80 शा बद्ध उद्यमिएं अपनिएं चीजें-बस्ते गी रखे दा ऐ। स्थलें दा दौरा लांदे होई जम्मू दे बंज-बपार निदेशक डॉ. अरुण कुमार मन्हास होरें डिवीजनल कमीशनर होरें गी प्रधानमंत्री रोजगार सृजन कार्यक्रम पीएम ईजीपी ते बंज बपार मैहकमे राएं माली मदाद हासल कामयाब महिला उद्यमिएं दी कामयाबी आलिएं कहानिएं कन्नै अवगत करोआया। उनें गलाया जे एह उद्यमी होर दुए नोजवानें गी उद्यमिता बक्खी प्रेरित करा करदे न ते बजाए नौकरी दी आस रखने दे ओ नौकरियां देने आले बना'रदे न।

<><><><><><>

White Knight Corps

सामरिक सेना दी वाईट नाईट कोर, जिसी 16 कोर दे नां कन्नै बी जानेआ जंदा ऐ, दे 52में स्थापना दिवस दे मौके पर जीओसी लैफ्टिनेंट जनरल नवीन सचदेवा होरें बेजोड़ मानकें लेई सब्बने रेंकें दी सराहना कीती।

सर्वोच्च बलिदान देने आले शहीदें दे चेते च जीओसी होरें रिवायती पुष्पांजलि समारोह दरान अश्वमेघ शौर्य स्थल पर फुल चाड़ियै उनेंगी भावें भरोची श्रद्धांजलि भेंट कीती। लैफिटनेंट जनरल नवीन सचदेवा होरें सब्बै सैनिकें गी वाईट नाईट कोर दी भावना गी मूर्त रूप देने ताई जनदेही कन्नै अपने कर्तव्यें गी जारी रखने दा आह्वान कीता। पैहली जून 1972 च खडेरी गेदी इस कोर दा दिलेरी ते उत्कृष्टता आला इक शानदार इतिहास रेआ ऐ। कोर दे पैहले जीओसी लैफिटनेंट जनरल जे.एफ.आर.जैकब हे। नगरोटा च मुख्यालय आली वाईट नाईट कोर जम्मू कश्मीर च पीर पंचाल दे दक्खन च पहरेदार रेई ऐ।

<><><><><><>

ICC World Cup

भारत नै कल रातीं न्यूयार्क दे नासाड काउंटी इंटरनेशनल क्रिकेट स्टेडियम च आईसीसी मर्दे दे टी-20 विश्व कप 2024 दे अपने इक्कले अभ्यास मैच च भारत नै बंगलादेश उप्पर 60एं रजें दी शानदार जित्त हासल कीती ऐ।

<><><><><><>